

26/08/1997

PM terima anugerah tertinggi Brunei

KUALA LUMPUR, Isnin - Perdana Menteri, Datuk Seri Dr Mahathir Mohamad, hari ini menerima anugerah Bintang Kebesaran Negara Brunei Darussalam Darjah Kerabat Laila Utama Yang Amat Dihormati Darjah Pertama (D.K).

Anugerah tertinggi Kerajaan Brunei itu disampaikan oleh Sultan Brunei Darussalam, Sultan Hassanal Bolkiah, pada istiadat menghadap di sebuah hotel terkemuka di sini. Sultan Brunei tiba di sini hari ini untuk lawatan rasmi empat hari.

Pengurniaan bintang kebesaran itu adalah sebagai tanda penghormatan dan penghargaan Brunei atas usaha Perdana Menteri meningkat, mengukuh dan mengeratkan kerjasama antara Brunei dan Malaysia ke tahap cemerlang yang wujud sekarang.

Dr Mahathir adalah tokoh bukan raja atau kerabat dari luar Brunei yang pertama menerima anugerah itu.

Bintang kebesaran itu pernah dianugerahkan kepada raja dan kerabat-kerabat raja beberapa buah negeri di Malaysia, selain kerabat raja di Brunei sendiri.

Kedua-dua isteri Sultan Brunei, Paduka Seri Baginda Raja Isteri Pengiran Anak Hajjah Saleha dan Pengiran Isteri Hajjah Mariam turut berangkat pada majlis itu. Isteri Perdana Menteri, Datin Seri Dr Siti Hasmah Mohd Ali juga hadir.

(END)